

# Lerond

I.

Fine amours et bone esperance  
me ramainne joie et chanter,  
se cele m'oste ire et pesance  
qui tant m'avra fait endurer,  
c'ainc ne m'i vout guerredonner;  
pour ce ai esmai et doutance,  
se loiautez de bien amer  
u sa granz valours ne m'avance.

II.

Ja ne tenisse a mesestance  
qu'a ma dame m'estuet penser,  
se par aucune asseürance  
i cuidaisse merci trouver;  
maiz quant je pluz mi doi fier,  
lors i retruis male vueillance,  
si que je n'ose a li parler,  
ainz me muir en itel souffrance.

III.

Douce dame en qui j'ai fiance  
de ma grant joie recouvrer,  
membre vous qu'en longue atendance  
me porroit amours trop grever;  
je ne m'en puis reconforter,  
quar en vous est ma delivrance,  
dame, si vous en doit membrer,  
selonc vostre douce samblance.

IV.

Toute m'amour ferme et entiere  
doins a ma dame ligement;  
ja pour ce, s'el n'ot ma proiere,  
ne l'amerai mainz loiaument,  
quar n'est pas amours autrement:  
puiz c'on vait avant et arriere,  
sa painne en trait legierement  
qui aime dame nouveliere.

V.

Icele gent fole et ondiere

nous abaissent joie et jouvent,  
et fausse drue nouveliere,  
qui cestui leisse et autre prent;  
si voit l'en avenir souvent  
que la pluz fole est la pluz fiere;  
pour ce va amours a noient,  
que pou trove on maiz qui l'ait chiere.

- letto 555 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/lerond-1>